

John Fun:

Trabaonan di expansion y renobacion di hospital ta bayendo segun schedule



ORANJESTAD - Cu un schedule hopi streng y na un forma bon organisa, tur partido envolvi den e expansion y renobacion di Dr. Horacio E. Oduber Hospital ta trahando duro pa tin e proyecto aki cla y den ful operacion na tempo.

Aña pasa a cuminsa haci e cambianan necesario di e infraestructura di e tereno pa asina cuminsa cu e construccion di e edificionan nobo di Hospital esta e Medical Office Building (MOB), e New Bed Tower (NBT) y e edificio pa e utilidad. Despues di esaki lo sigui cu e renobacion di e edificio existente.

Aunke cu un di e contratistanan a haya esaki cu un stop di trabao pa via di un 'strike' di su trahadonan, e retraso aki lo wordo compensa, asina e Clustermanager Facilitair Bedrijf di Hospital, sr. John Fun, a splica. Pues, en realidad e trabao ta sigui "on schedule" manera cu e tabata for di "Day One". Sr. Fun tambe ta e persona encarga cu e logistica y coordinacion durante e periodo di construccion y renobacion di Hospital. El a splica cu lo dura mas of menos un aña mas pa

completa e edificio MOB y e "bed tower" ta programa pa ta cla na luna di september of october 2016.

Para dilanti di e edificio conoci como MOB (Medical Office Building), sr. Fun a splica cu a scoge pa e edificio aki pa asina separa e specialistanan y nan policlinicanan for di e cambernan di Hospital. E edificio aki lo tin tres piso, di cual dos piso ta destina pa e specialistanan y cierto serviccionan ideal pa ta cerca di Hospital. E di tres piso ta keda disponible pa cambianan, manera expansion di e cantidad di especialista, etc.

E Medical Office Building aki ta bay fungi prome como un espacio di cambio durante di e renobacion di Hospital, unda cu diferente departamento mester bay den e edificio y muda bek ora cu nan parti den e edificio original keda cla. Sr. Fun a splica cu loke ta rekeri hopi atencion y trabao cuidadoso ta e momento cu cuminsa cu e construccion paden di e edificio existente den e parti unda cu tin pashent; y unda cu e seguridad di e pashentnan mester keda salvaguardia bao di tur circunstancia.



90 cama

E "bed tower" nobo lo tin 90 cama, sr. Fun a splica. A scoge pa no añadi riba e cantidad di cama, pero pa e configuracion di e cambernan. Actualmente Hospital conoce ainda hopi camber pa seis pashent, tanten cu den e edificio nobo a scoge pa elimina e cambernan di seis persona y provee cambernan pa cuater, dos y un persona cu ta duna mas privacidad. E contratista ya a basha e fundeshi di e bed tower nobo cu lo bay tin cinco piso y ta trahando caba riba e di dos piso, sr. Fun a indica.

E ta agrega cu e "curason" di e edificio nobo, pues unda lo tin e planta central di energia, incluyendo coriente, aircor, transformator, pero tambe un deposito nobo lo ta cla e aña aki caba.

E coordinacion di parti di Hospital mes ta den man di un grupo chikito cu ta forma e comision di construccion y renobacion di Hospital y ta bou guia di Ruben Croes. Den transcurso di e proyecto tambe ta yama aden colaborado di diferente departamentu pa contribui cu nan experticio ora ta necesario. Nan ta contento di ta traha segun schedule y nan lo sigui informa comunidad tocante e desaroyonan di nos Hospital nobo. □